

# L'Odore Di I Nostri Mesi

Ottobre sente e castagne  
In paese fumicosu  
Quand'u celu nebbiacosu  
Fala nant'à le muntagne  
Pare tutt'avvene chjosu  
È finite le cuccagne.

Pare tutt'avvene chjosu  
È finite le cuccagne.

Dicembre sente l'aranciu  
Chì fiurisce per sse piaghje  
Ma quandi lu ventu traghje  
Piglia inguernu lu sbilanciu  
Tempu d'acque è di nivaghje  
Affannosu è pocu danciu.

Tempu d'acque è di nivaghje  
Affannosu è pocu danciu.

Maghju sente la ghjinestra  
Chì sbuccia per lu pughjale  
Inzeppisce fiuminale  
Verdicheghja la campestra  
L'acelli spàrghjenu l'ale  
Si spalanca la finestra.

L'acelli spàrghjenu l'ale  
Si spalanca la finestra.

Aostu sente a filetta  
Calpighjata à merendella  
A notte s'empie di stelle  
Di dolcezza benedetta  
In core di le zitelle  
Ci hè un fiore chì l'aspetta.

In core di le zitelle  
Ci hè un fiore chì l'aspetta.

Chì senteranu li mesi  
Di la pròssima stagione  
Duve pianterà viaghjone  
Cù le so sperenze appese  
È basteranu e canzone  
Per guarì tutte l'offese?

È basteranu e canzone  
Per guarì tutte l'offese?